

ZAKON

***O PRIMJENI ODREĐENIH PRIVREMENIH MJERA RADI EFIKASNOG PROVOĐENJA MANDATA
MEĐUNARODNOG KRIVIČNOG SUDA ZA BIVŠU JUGOSLAVIJU TE DRUGIH MEĐUNARODNIH
RESTRIKTIVNIH MJERA***

POGLAVLJE I. OPĆE ODREDBE

Član 1.

(Predmet i svrha ovog Zakona)

- (1) Ovim Zakonom uređuje se primjena međunarodnih restriktivnih mjera koje, u skladu s međunarodnim pravom, Bosna i Hercegovina primjenjuje protiv država, međunarodnih organizacija, teritorijalnih jedinica, pokreta ili fizičkih i pravnih lica te drugih subjekata obuhvaćenih međunarodnim restriktivnim mjerama.
- (2) Ovim Zakonom posebno se uređuje uvođenje i primjena određenih privremenih mjera s ciljem privremenog sprečavanja korištenja, otuđenja ili drugog raspolaganja imovinom lica optuženih pred Međunarodnim krivičnim sudom za teška kršenja međunarodnog humanitarnog prava počinjena na području bivše Jugoslavije od 1991. godine (skraćeno: Međunarodni krivični sud za bivšu Jugoslaviju; u daljnjem tekstu: MKSJ), a koja nisu dostupna tom sudu i njihovih pomagača u izbjegavanju dostupnosti tom sudu.
- (3) Svrha ovog Zakona je da se u Bosni i Hercegovini predvidi način provođenja rezolucija Vijeća sigurnosti Ujedinjenih naroda ili odluka Evropske unije koje predviđaju međunarodne restriktivne mjere, a posebno Rezolucije Vijeća sigurnosti Ujedinjenih naroda 1503 (2003.) primjenom određenih mjera s ciljem efikasnog provođenja mandata MKSJ.

Član 2.

(Međunarodne restriktivne mjere)

- (1) Međunarodne restriktivne mjere uključuju: embargo na oružje, potpune ili djelimične restrikcije uvoza ili izvoza, restrikcije ulaska u zemlju, finansijske restrikcije, te druge mjere u skladu s međunarodnim pravom.
- (2) Međunarodne restriktivne mjere Bosna i Hercegovina primjenjuje zbog provođenja međunarodnih pravnoobavezujućih odluka Ujedinjenih naroda ili kada se pridruži restriktivnim mjerama Evropske unije ili u drugim slučajevima u skladu s međunarodnim pravom.
- (3) O načinu uvođenja, provođenja i ukidanja međunarodnih restriktivnih mjera koje nisu posebno uređene ovim Zakonom odlučuje Vijeće ministara Bosne i Hercegovine (u daljnjem tekstu: Vijeće ministara) nakon konsultacije s Predsjedništvom Bosne i Hercegovine (u daljnjem tekstu: Predsjedništvo).
- (4) Na finansijske restrikcije primjenjuju se odredbe poglavlja II. i III. ovog Zakona, i kad se provode protiv drugih lica osim optuženih pred MKSJ a nedostupnih tom sudu i njihovih pomagača, ako međunarodnim pravom nije drugačije određeno.
- (5) Ministarstvo vanjskih poslova Bosne i Hercegovine (u daljnjem tekstu: Ministarstvo vanjskih poslova) i Direkcija za evropske integracije Bosne i Hercegovine (u daljnjem tekstu: Direkcija za evropske integracije) dužni su odmah obavijestiti Vijeće ministara i Predsjedništvo o određivanju međunarodnih restriktivnih mjera.

Član 3.

(Značenje izraza u ovom Zakonu)

Pojedini izrazi korišteni u ovom Zakonu imaju sljedeće značenje:

- a) **optuženo lice** je lice protiv kojeg je podignuta optužnica pred MKSJ, a koje nije dostupno tom sudu.
- b) **pomagač optuženog lica** je svako fizičko ili pravno lice za koje postoje osnove sumnje da pruža pomoć optuženom licu u izbjegavanju dostupnosti MKSJ, uključujući i bračnog ili vanbračnog druga, srodnika po krvi u pravoj liniji, brata ili sestru, usvojioca ili usvojenika i njihovog bračnog ili vanbračnog druga. Pomagač je također i branilac, ljekar ili vjerski ispovjednik optuženog lica ako postoje osnove sumnje da pomoć koju pruža

optuženom licu nije pomoć u okviru njegovog stručnog djelovanja, već pomoć u izbjegavanju dostupnosti MKSJ.

c) **fondovi** znače bilo kakvu finansijsku imovinu ili korist, kao što su:

- 1) gotovina, čekovi, novčana potraživanja, mjenice, platni nalozi i drugi sredstva plaćanja,
- 2) depoziti kod finansijskih institucija ili drugih subjekata, salda na računima, potraživanja i prava koja proizilaze iz potraživanja,
- 3) vrijednosni papiri koji su predmet berzanske ili druge vrste prodaje, kao što su dionice ili udjeli, certifikati, obveznice i druge vrste vrijednosnih papira,
- 4) kamate, dividende i drugi prihodi koji proističu iz imovine,
- 5) kredit, pravo na kompenzaciju, garancije izvršenja i druga finansijska prava,
- 6) kreditna pisma, konosmani, otpremnice i zaključnice,
- 7) dokumenti kojima se dokazuje interes u fondovima ili finansijskim sredstvima,
- 8) svaki drugi instrument kojim se stimulira finansiranje izvoza,

d) **ekonomska sredstva** znače svaku vrstu imovine, materijalnu i nematerijalnu te pokretnu i nepokretnu, koja ne predstavlja fondove ali se može koristiti za sticanje fondova, roba ili usluga.

POGLAVLJE II. PRIVREMENE FINANSIJSKE MJERE PROTIV LICA OPTUŽENIH PRED MKSJ I NJIHOVIH POMAGAČA

Član 4.

(Vrste privremenih finansijskih mjera prema ovom Zakonu)

(1) Privremene mjere, koje se prema ovom Zakonu primjenjuju s ciljem privremenog sprečavanja korištenja, otuđenja ili drugog raspolaganja imovinom su:

- a) zamrzavanje fondova; i
- b) zamrzavanje ekonomskih sredstava.

(2) Zamrzavanje fondova je sprečavanje bilo kakvog kretanja, transfera, izmjene, upotrebe, pristupa ili upravljanja ili raspolaganja fondovima koje bi dovelo do promjene u njihovom obimu, iznosu, lokaciji, vlasništvu, posjedu, karakteru, destinaciji ili neke druge promjene koja bi omogućila korištenje fondova, uključujući i upravljanje fondovima, odnosno portfeljom.

(3) Zamrzavanje ekonomskih sredstava je sprečavanje njihovog korištenja s ciljem sticanja fondova, robe ili usluga na bilo koji način, kao što je njihova prodaja, najam ili stavljanje pod hipoteku.

Član 5.

(Značaj privremenih mjera)

(1) Primjenom privremenih mjera zamrzavanja fondova i zamrzavanja ekonomskih sredstava se:

- a) zamrzavaju svi fondovi i ekonomska sredstva koja pripadaju ili su u vlasništvu ili posjedu ili ih drži lice prema kojem se mjere primjenjuju;

b) fondovi i ekonomska sredstva ne mogu učiniti dostupnima, direktno ili indirektno, u ime ili u korist lica prema kojem se mjera primjenjuju; i

c) zabranjuju bilo kakve radnje s ciljem, direktnog ili indirektnog, svjesnog izbjegavanja mjera iz tački a) i b) ovog stava.

(2) Odredba tačke b) stava (1) ne odnosi se na potraživanja (priliv) zamrznutih računa po osnovu kamata ili drugih koristi, odnosno prihoda tih računa ili po osnovu uplata po ugovorima ili sporazumima koji su zaključeni ili potraživanja koja su se pojavila prije početka primjene odluke o primjeni mjera prema određenom licu, pod uvjetom da se na svaku takvu kamatu ili drugu korist, odnosno prihod ili uplatu i dalje primjenjuje odredba tačke a) stava (1) ovog člana.

(3) Odredba tačke b) stava (1) ovog člana ne sprečava doznačavanje na zamrznuti račun od finansijske institucije koja primi fondove transferirane od trećih lica u korist računa lica prema kojem se primjenjuju mjere, pod uvjetom da su sva takva doznačena potraživanja (priliv) po tom računu također zamrznuta.

Član 6.

(Obaveza dostavljanja informacija)

(1) Fizička i pravna lica, organizacije, organi i institucije će odmah nakon saznanja dostaviti Ministarstvu sigurnosti Bosne i Hercegovine (u daljnjem tekstu: Ministarstvo sigurnosti) svaku informaciju o provođenju odluke o primjeni mjera prema određenom licu, kao što je informacija o zamrznutim računima i iznosima, i saradivati će s Ministarstvom sigurnosti u provjeri takvih informacija.

(2) Posebno će finansijske institucije informirati Ministarstvo sigurnosti o izvršavanju doznaka iz člana 5. (*Značaj privremenih mjera*) stava (3) ovog Zakona.

(3) Ministarstvo sigurnosti može koristiti informacije iz ovog člana samo u svrhu u koju je informacija dostavljena.

Član 7.

(Vođenje baze podataka)

(1) Ministarstvo sigurnosti osniva i vodi bazu podataka o licima protiv kojih su uvedene međunarodne restriktivne mjere, odnosno privremene mjere po ovom Zakonu.

(2) Podaci iz baze podataka dostupni su institucijama Bosne i Hercegovine i drugim institucijama ili organima kojima su podaci potrebni u okviru njihove nadležnosti, odnosno za obavljanje djelatnosti za koje su ovlašteni, pri čemu se primjenjuju propisi o zaštiti ličnih podataka i zaštiti tajnosti podataka.

(3) Ministarstvo sigurnosti dostavlja podatke iz baze podataka na zahtjev Ujedinjenih naroda ili Evropske unije.

Član 8.

(Izuzeci za životne troškove)

(1) Izuzetno od člana 5. (*Značaj privremenih mjera*) stava (1) ovog Zakona, Sud Bosne i Hercegovine (u daljnjem tekstu: Sud BiH) odobriti će oslobađanje pojedinih zamrznutih fondova ili ekonomskih sredstava ili odobriti da se oni učine dostupnim, ako utvrdi da su fondovi ili ekonomska sredstva neophodni za podmirenje osnovnih životnih troškova, uključujući troškove ishrane, stanarine, odnosno najamnine ili hipoteke za prostor stanovanja, lijekova i liječenja, poreza i osiguranja, ili troškova javnih komunalnih usluga.

(2) Izuzetno od člana 5. stava (1) ovog Zakona, Sud BiH također može odobriti oslobađanje pojedinih zamrznutih fondova ili ekonomskih sredstava ili odobriti da se oni učine dostupnim, ako utvrdi da su fondovi ili ekonomska sredstva:

a) namijenjeni isključivo plaćanju nagrade i nadoknade troškova profesionalne pravne pomoći, u razumnom iznosu;

b) namijenjeni isključivo za plaćanje naknade za redovno vođenje zamrznutih fondova ili ekonomskih sredstava;

c) neophodni za vanredne troškove.

(3) Odlučujući prema st. (1) i (2) ovog člana, Sud BiH može odrediti uvjete pod kojima odobrava oslobađanje, odnosno dostupnost fondova ili ekonomskih sredstava.

(4) Sud BiH obavijestit će Ministarstvo sigurnosti o odobrenju iz ovog člana najkasnije osam dana prije davanja odobrenja.

(5) Ministarstvo sigurnosti će o svakom odobrenju o kojem je odlučeno prema ovom članu obavijestiti nadležne organe međunarodnih organizacija i država koje primjenjuju iste restriktivne mjere prema istim licima.

Član 9.

(Izuzeci za pojedine obaveze)

(1) Izuzetno od člana 5. (*Značaj privremenih mjera*) stava (1) ovog Zakona, Sud BiH također može odobriti oslobađanje pojedinih zamrznutih fondova ili ekonomskih sredstava pod sljedećim uvjetima:

a) ako su fondovi ili ekonomska sredstva postali predmet obaveze po sudskoj, upravnoj ili arbitražnoj odluci prije početka primjene odluke o primjeni mjera prema određenom licu,

b) ako će se fondovi ili ekonomska sredstva koristiti isključivo radi izmirenja takve obaveze,

c) ako sudska, upravna ili arbitražna odluka nije donesena u korist lica prema kojem su primijenjene privremene mjere zamrzavanja fondova i ekonomskih sredstava,

d) ako priznanje takve obaveze nije u suprotnosti s pravnim poretkom Bosne i Hercegovine.

(2) Sud BiH obavijestit će Ministarstvo sigurnosti o odobrenju iz ovog člana najkasnije osam dana prije davanja odobrenja.

(3) Ministarstvo sigurnosti će o svakom odobrenju o kojem je odlučeno prema ovom članu obavijestiti nadležna tijela međunarodnih organizacija i država koje primjenjuju iste restriktivne mjere prema istim licima.

POGLAVLJE III. PRIMJENA PRIVREMENIH FINANSIJSKIH MJERA PROTIV LICA OPTUŽENIH PRED MKSJ I NJIHOVIH POMAGAČA

Član 10.

(Primjena prema optuženim licima)

(1) U Bosni i Hercegovini primjenjuju se privremene mjere zamrzavanja fondova i zamrzavanja ekonomskih sredstava lica optuženih pred MKSJ a nedostupnih tom sudu.

(2) U Bosni i Hercegovini, u skladu sa stavom (3) ovog člana, primjenjuje se spisak lica iz stava (1) ovog člana prema kojima su određene mjere, a koji su utvrdili Ujedinjeni narodi ili Evropska unija, uključujući i sve njegove izmjene i dopune.

(3) Vijeće ministara donosi odluku kojom uvodi privremene mjere iz stava (1) ovog člana prema licima optuženim pred MKSJ a nedostupnim tom sudu na osnovu spiska iz stava (2) ovog člana i objavljuje je u "Službenom glasniku BiH".

(4) Protiv odluke Vijeća ministara iz stava (3) ovog člana može se pokrenuti postupak pred Sudom BiH.

(5) Ministarstvo vanjskih poslova i Direkcija za evropske integracije dužni su odmah obavijestiti Vijeće ministara o utvrđivanju spiska lica iz stava (2) ovog člana.

Član 11.

(Primjena prema pomagačima)

(1) Privremene mjere zamrzavanja fondova i zamrzavanja ekonomskih sredstava pomagača lica optuženih pred MKSJ a nedostupnih tom sudu primjenjuju se prema Zakonu o krivičnom postupku Bosne i Hercegovine ("Službeni glasnik BiH", br. 3/03, 32/03, 36/03, 26/04, 63/04, 13/05 i 48/05; u daljnjem tekstu: Zakon o krivičnom postupku).

(2) U skladu sa stavom (1) ovog člana, prema pomagačima lica optuženih pred MKSJ a nedostupnih tom sudu, glavni tužilac Bosne i Hercegovine (u daljnjem tekstu: tužilac) postupa naročito po članu 35. (*Prava i dužnosti*) i 216. (Naredba o provođenju istrage) Zakona o krivičnom postupku. Za određivanje i provođenje privremenih mjera prema ovim licima primjenjuju se član 65. (*Naredba za oduzimanje predmeta*), 66. (*Privremeno oduzimanje predmeta bez naredbe*), 72. (*Naredba banci ili drugom pravnom licu*) i 73. (*Privremeno oduzimanje imovine radi osiguranja*) te ostale odredbe Zakona o krivičnom postupku.

(3) Kad Ujedinjeni narodi, druga međunarodna organizacija ili Evropska unija odrede primjenu određene restriktivne mjere prema državljaninu Bosne i Hercegovine, ili prema drugom licu a u vezi s postojanjem osnova sumnje da je krivično djelo počinjeno na području Bosne i Hercegovine, tužilac postupa po čl. 35. i 216. te ostalim odredbama Zakona o krivičnom postupku, čim sazna za određivanje restriktivne mjere.

(4) Odredbe ovog člana ne utiču na provođenje odluke Ujedinjenih naroda koju je Bosna i Hercegovina dužna provoditi po međunarodnom pravu ni na međunarodnopravne obaveze Bosne i Hercegovine (član 2. *Međunarodne restriktivne mjere*).

Član 12.

(Obaveze institucija)

(1) U skladu s odlukom iz člana 10. (*Primjena prema optuženim licima*) stava (3) ili člana 11. (*Primjena prema pomagačima*) st. (1) i (2) o primjeni privremenih mjera prema određenom licu te s odredbama člana 5. (*Značaj privremenih mjera*) i odlukama iz člana 8. (*Izuzeci za životne troškove*) i 9. (*Izuzeci za pojedine obaveze*) ovog Zakona, naročito postoje sljedeće obaveze:

a) Sve nadležne institucije u Bosni i Hercegovini koje raspolažu podacima o imovini lica prema kojem se mjere primjenjuju, dužne su u okviru svoje nadležnosti preduzeti konkretne mjere s ciljem primjene privremenih mjera.

b) Sve banke i druge finansijske institucije te osiguravajuća društva u Bosni i Hercegovini, kod kojih lice prema kojem se primjenjuju mjere ima otvoren račun, dužni su onemogućiti novčane transakcije s računa tog lica.

c) Svi organi i institucije u Bosni i Hercegovini koji prema zakonu vode evidenciju o imovini dužni su, u okviru svoje nadležnosti, onemogućiti promjenu prava vlasništva, prijenos prava vlasništva ili posjeda i opterećenje imovine.

(2) U smislu tačke c) stava (1) ovog člana, nadležni organi i institucije koje vode evidenciju o imovini izvršit će ubilježbu privremene mjere, a registarski sudovi onemogućit će statusne promjene privrednih i drugih subjekata čiji je vlasnik ili suvlasnik lice prema kojem se primjenjuju mjere ili se na drugi način utvrdi da to lice ima udio u imovini tih subjekata, u vlasničkom, suvlasničkom ili drugom udjelu tog lica.

Član 13.

(Prestanak primjene mjera prema optuženim licima)

(1) Primjena privremenih mjera zamrzavanja fondova i zamrzavanja ekonomskih sredstava prema pojedinom licu optuženom pred MKSJ a nedostupnom tom sudu prestaje određivanjem prestanka primjene mjere prema tom licu.

(2) Odluku o prestanku primjene mjere prema optuženom licu donosi Vijeće ministara na osnovu spiska lica prema kojima se primjenjuju određene mjere, a koji su utvrdili Ujedinjeni narodi ili Evropska unija. Odluka se donosi izmjenom spiska ili na drugi način i objavljuje se u "Službenom glasniku BiH".

(3) Razlozi prestanka primjene mjere prema licu optuženom pred MKSJ a nedostupnom tom sudu su:

a) ako je optuženo lice prema kojem su određene privremene mjere postalo dostupno institucijama Bosne i Hercegovine ili direktno MKSJ;

b) ako se utvrdi da je optuženo lice prema kojem su određene privremene mjere preminulo;

c) u drugim slučajevima u skladu s međunarodnim pravom.

(4) S ciljem utvrđivanja postojanja razloga za prestanak primjene mjera, Vijeće ministara razmatra spisak optuženih lica prema kojima se primjenjuju mjere u najkraćem mogućem roku od ostvarenja nekog od razloga iz stava (3) ovog člana, a najmanje svaka tri mjeseca od dana početka primjene mjera, ali se privremena mjera ne može prestati primjenjivati u Bosni i Hercegovini prije nego što je prestala njena primjena na međunarodnom nivou.

Član 14.

(Prestanak primjene mjera prema pomagačima)

(1) Na prestanak primjene mjera prema pomagaču primjenjuje se Zakon o krivičnom postupku.

(2) Privremena mjera prema pomagaču koja je određena na osnovu ovog Zakona ukinut će se u slučajevima iz člana 13. (*Prestanak primjene mjera prema optuženim licima*) stava (3) tač.a) i b), ako ne postoji neki drugi razlog za njenu primjenu prema krivičnom zakonodavstvu Bosne i Hercegovine.

POGLAVLJE IV. PREKRŠAJNE ODREDBE

Član 15.

(Povrede odredbi članova 5. i 12. ovog Zakona)

(1) Novčanom kaznom u iznosu od 50.000 KM do 150.000 KM kaznit će se za prekršaj pravno lice ako:

a) protivno odredbama člana 5. (*Značaj privremenih mjera*) i člana 12. (*Obaveze institucija*) stava (1) tačke b), a u skladu s odlukama iz člana 8. (*Izuzeci za životne troškove*) st. (1) i (2), 9. (*Izuzeci za pojedine obaveze*) stava

(1), 10. (*Primjena prema optuženim licima*) stava (3) ili člana 11. (*Primjena prema pomagačima*) st. (1) i (2) ovog Zakona, ne zamrzne fondove ili ekonomska sredstva koja pripadaju ili su u vlasništvu ili posjedu ili ih drži lice prema kojem se mjere primjenjuju; ili

b) protivno odredbama člana 5. i člana 12. stava (1) tačke b), a u skladu s odlukama iz člana 8. st. (1) i (2), člana 9. stava (1), člana 10. stava (3) ili člana 11. st. (1) i (2) ovog Zakona, učini dostupnima fondove ili ekonomska sredstva, direktno ili indirektno, u ime ili u korist lica prema kojem se mjere primjenjuju.

(2) Za prekršaje iz stava (1) ovog člana kaznit će se i odgovorno lice u pravnom licu novčanom kaznom u iznosu od 5.000 KM do 15.000 KM.

(3) Za prekršaje iz stava (1) ovog člana fizičko lice kaznit će se novčanom kaznom u iznosu od 2.000 KM do 5.000 KM, ako se fizičko lice može zakonito baviti relevantnim djelatnostima.

Član 16.

(Povrede odredbi člana 6. ovog Zakona)

(1) Novčanom kaznom u iznosu od 5.000 KM do 15.000 KM kaznit će se za prekršaj pravno lice ako:

a) protivno odredbi člana 6. (*Obaveza dostavljanja informacija*) stava (1) ovog Zakona, ne dostavi odmah po saznanju Ministarstvu sigurnosti svaku informaciju o provođenju odluke o primjeni mjera prema određenom licu ili ne saraduje s Ministarstvom sigurnosti u provjeri takvih informacija; ili

b) protivno odredbi člana 6. stava (2) ovog Zakona, ne informira Ministarstvo sigurnosti o izvršavanju doznaka iz člana 5. (*Značaj privremenih mjera*) stava (3) ovog Zakona.

(2) Za prekršaje iz stava (1) ovog člana kaznit će se i odgovorno lice u pravnom licu novčanom kaznom u iznosu od 500 KM do 1.500 KM.

(3) Za prekršaje iz stava (1) ovog člana fizičko lice kaznit će se novčanom kaznom u iznosu od 300 KM do 900 KM, ako se fizičko lice može zakonito baviti relevantnim djelatnostima.

POGLAVLJE V. PRIJELAZNE I ZAVRŠNE ODREDBE

Član 17.

(Praćenje primjene privremenih finansijskih mjera prema optuženim licima i pomagačima)

(1) Ministarstvo sigurnosti prati primjenu privremenih mjera prema licima optuženim pred MKSJ a nedostupnim tom sudu i njihovim pomagačima i, po potrebi, o tome izvještava Vijeće ministara, a najmanje svaka tri mjeseca, ili na zahtjev Vijeća ministara.

(2) Ministarstvo sigurnosti će, u okviru svojih ovlaštenja, preduzeti odgovarajuće mjere s ciljem sprečavanja postupaka koji bi mogli dovesti do posljedica suprotnih sadržaju privremenih mjera.

Član 18.

(Praćenje provođenja međunarodnih restriktivnih mjera)

(1) Za praćenje provođenja međunarodnih restriktivnih mjera iz člana 2. ovog Zakona, na zahtjev Predsjedništva ili prijedlog Ministarstva vanjskih poslova ili Ministarstva sigurnosti, Vijeće ministara osniva međuresornu grupu za praćenje provođenja međunarodnih restriktivnih mjera (u daljnjem tekstu: međuresorna grupa).

(2) Međuresorna grupa je stalno radno tijelo.

- (3) Međuresornu grupu čine predstavnici ministarstava nadležnih za vanjske poslove, sigurnost, odbranu, finansije, ekonomske odnose i pravdu.
- (4) Stručne i administrativne poslove za međuresornu grupu obavlja Ministarstvo vanjskih poslova.
- (5) Način rada međuresorne grupe uredit će se poslovnikom koji donosi sama grupa.

Član 19.

(Usklađivanje ranijeg propisa)

Vijeće ministara uskladit će svoju Odluku kojom se licima osumnjičenim od Međunarodnog krivičnog suda za bivšu Jugoslaviju, koja nisu dostupna Tribunalu, onemogućava da raspolaze svojom imovinom u Bosni i Hercegovini", broj 274/04, od 19. novembra 2004. ("Službeni glasnik BiH", br. 60/04), s odredbama ovog Zakona.

Član 20.

(Stupanje na snagu ovog Zakona)

Ovaj Zakon stupa na snagu osmog dana od dana objavljivanja u "Službenom glasniku BiH".